

四庫全書

集部

欽定四庫全書

集部

高峯文集卷十

詳校官庶吉士_臣李如筠

主事_臣呂雲棟覆勘

總校官庶吉士_臣何思鈞

校對官中書_臣王家賓

謄錄監生_臣陳炳

欽定四庫全書

高峯文集卷十

宋 廖剛 撰

詩

詞附

次韻彥平叔見贈

十年東序愧囊錐
浪學何生且一歸
遠道幾煩黃耳走
故山今謝白雲飛
燕游未許安仁里
夢想頻驚在禮闈
爭似釣臺飽風月
一谿桃李自霏霏

大學送余適正往洛中就館

少小各西東天涯會兩蓬相看身未了欲別意無窮
歲晚嵩山雪天寒洛浦風寂寥倚孤劍應憶笑言同

代祖父次韻酬羅君寶見贈

蕭條門巷陋於顏老去青春僅得閑心畫傳家無計策
手談留客謾機關靜思往事千年上俯歎勞生一夢間
多謝光臨無別意爲聞流水與高山

次韻陳無傷春日書事

百草千花巧趁春愛春何獨水邊人青門紫陌酒旗颺

麗日和風天氣新
白玉少年長帶珮
紅蕖遊女小腰身
自憐慣作金明客
坐對閑窻滿席塵

次韻張敏叔江南僧舍送春之什

使華綵旆明春江
江邊佛國遊清涼
柔桑苑苑絲成蔭
落花寂寂紅餘香
人間節物易流轉
獨有日月壺中長
高懽應笑杜陵客
典衣沽酒留風光

題丁樂道分翠軒

十畝清陰隔短牆
幽香端許借餘光
脩篁夏玉亂垂影

佳木屯雲巧著行
隱几助成春草夢
卷簾饒占北窓涼
誰知靖節心源冷
獨眄庭柯興味長

題諸宮

燕子無情語亦稀
春風池沼自漣漪
當年勝事歸何許
苔沒龜趺有舊碑

二

畫橋紅去卷蛾眉
臺榭遺蹤草樹迷
猶有天然無限意
一池春水浴鳧鷖

三

蔓草春深綠更齊
玉鞭何處選芳菲
舊時錦綉叢中蝶
却傍疎籬野菜飛

次韻和陳幾叟苦雨

雲霧陰陰閣太虛
雨餘蛙蚓上階除
山顏井塌應無奈
大有人愁化作魚

題楊子光雙溪閣

倚天華棟俯長洲
渺渺雙溪一檻秋
匹馬問津迷去客

亂帆分港競歸舟
花飄兩洞紅交浪
影落三山翠合流
清夜鳴榔何處曲
冷光平泛玉簾鉤

題胡器之鐔溪閣

龍津劍窟古南州
閣勢橫空占上流
山色鎮留春色在
水光長帶寶光浮
風檐綠篠寒珠箔
雨岸紅蕖隱釣舟
祇恐楓宸促歸覲
未容瀟洒老滄洲

題賢女舖

南安軍之境舊有貞女舖
相傳云有一女子

受聘未嫁而夫卒其家更許其兄弟女以義
不可辭不獲從遂投水而死鋪在鐔上因以
得名後避諱改今名謝孝廉名師知南康縣
追記其事尉曾定民詩次其韻和之徃虔州
之大觀也

世上男兒半可羞貞姿誰欲遣隨流百年負愧生何益
一諾難酬死即休明月碧溪長共潔孤雲落日自含愁
懸知萬古悲行客不待亭皋木葉秋

次韻侯思孺席間作

辛卯間寓居相國寺前鹿家巷與朱希參黃
敦言侯思孺同過喬通叔小飲時通叔得郡

湖南

微雲過疎雨一洗塵土昏
潛行德幽寓隱約桃源村
須臾勝士集氣類非權門
圖史恣娛目琴碁聊侑樽
豈無肴炙珍憶鱸偏薦尊
大笑屋瓦震雄辨江濤翻
却愁賢主人早晚東南奔
誰與識我輩咄哉非汝髡

次韻酬王元衷相過夜話次日見寄

短檠移燭光敗席掃蠶蜚軒昂僅容膝良媿生事拙妙
語契深心澄潭皎寒月何當日相尋尚陋溫伯雪

虔州送知府石舜弼吏部二首

風流萬石有孫傳偉望孤標拔俊躔鳳闕翔翔綿二紀
虎城留滯肯三年龔黃術業今誰比臯呂章程舊獨賢
政恐君王念耆碩未教長作洞中仙

二

竭來臨撫未暮年五袴謹謠已藹然公道直堪平贛石
清風那用挹廉泉飛帆便恐迷三島緩轡聊須選一錢
最有後車湖上客夢隨旌旆作神仙

月波樓上呈知府檢討

月波自昔騰佳名練光一帶縈寒城摧風剝雨歲月古
拊檻足慄憂顏傾恍然宏麗驚幻化雲舒霞爛飛雕甍
烟收霧歛霽色淨菱花玉女新粧成瑠璃萬傾浸蟾腹
星河帖底游魚明榮光爽氣長不夜但覺零露涓涓清

彩虹飛跨度別島縹緲嬉笑歸蓬瀛紅蕖照水翠蓋合
往往輝映雙華旌廣寒宮闕倘未到絕致惟欲輕題評
君不見錢塘有美東南冠覆壓湖山美輪奐海門日日
子胥潮百里青烟付朝爨又不見松江起尺跨垂虹騎
鯨直下窺龍宮危攔欲凭駭神觀萬葉出沒風濤中月
波境對了無此一色涵空天共水圓明湛靜趣已高不
與二景爭雄豪猗歎興廢物有數高韻庾公今日遇治
荒斥陋意所便荷鍾去趨舞襦袴西園花木頓生春結

客從今朝與暮嘉禾爲郡亦云久壯觀從來未曾有月
波解與去思長千古風流端不朽

送黃秀實著作赴單父任

憶昔負笈遊虞庠三千縫掖紛袍霜英姿銳氣磨干將
凌雲薄漢爭翱翔君時捧書自閩鄉賈生十八驚洛陽
南宮我適同廣場邂逅愚智俱忘羊低回十載燈燭光
織鱗壁水追洋洋憐君兄弟雙鳳皇鄧林秀出凡攄樟
才名籍籍日以香誰者不識江夏黃登籍還許聯龍章

米糠初未精簸揚須臾綠驥馳康莊瑤池下澤殊行藏
西清椽筆金玉相揚鞭緩珮鵠鷺行丘明遷固與頡頏
汗流暉壽走且僵文奎忽度南斗傍江湖洗耳聽鳴榔
相逢一笑百念亡玉自輝潔蘭仍芳元經寂寞誰問楊
逃空我幸論肺腸蛟龍蟠蜚豈可常賜環長恐成參商
春風三月鴛燕忙橋飛柳絮隨風狂修補冉冉將征艗
別離安得情無傷如君知音滿廟堂塵沙肯使埋珪璋
鵬程九萬詎易量從今拭目看騰驤我慚百事無一長

獨有疏懶勝嵇康功名老大空激昂那能俯仰巡門牆
艱難辛苦亦備嘗濯纓早晚尋滄浪與君後會何渺茫
江魚塞鴈無相忘

次韻劉天常赴郡會有作

雨萼煙梢恰半春九華峯翠綺筵陳花香暗逐金蓮步
燭影潛交玉兔輪青鳥不傳言外意紫雲應識醉中真
鳴珂擁戶蓬壺夜想見愁看撒舞茵

紫雲杜牧之事

百草千花巧趁春，曲欄幽徑總鋪陳。
舞腰盡欲看回雪，詩匠誰當斲斲輪。
難把星波渾作事，須知簧語有非真。
何如玉鐙歸來晚，紅袖爭扶入錦茵。

二詩皆即其席間事戲之

次韻酬羅彪秀才見贈

漫士誰當識姓名，竭來微宦稱單平。
卑栖已分軒無過，高誼良慙蓋始傾。
負米未容辭五斗，屠羊安得羨三旌。
夫君信欲光蓬陋，浪擲新詩一羽輕。

題朱池驛

云是買臣別業在睦州境內

道行妻子爾胡顏閭巷封侯亦不難直使榮華傾後世

朱池終媿近嚴灘

留題甚多皆景慕過當故云

別本覺老淨悟大師偈

癸巳中春獨遊與淨悟語終日登舟書此示

之寺瀕河大槩似長盧

過客小長盧馨香滿道途我來聞好語歸棹舞新蒲

道源朝奉重陽後以詩招賞菊走筆荅之

欲摘金英露濕衣暗香還逐曉風微仙翁可解追時節

心想何妨舉世非

送敏叔祠部赴廬州

平生才業笑時髦
唾手功名晚未遭
白髮早憐西日遠
紅旗還值北風高
定知國士逢青眼
會遣鄉僮賣寶刀
獨有失依門下客
夢隨仙舸泛江濤

鄭彥敏以詩惠小女作紅黃雪牡丹次韻答之
玉色誰將巧染丹
粧成嬌脆學應難
謝家兒女空才思
不似枝頭許細看

舟次嚴子陵釣臺當時出舟中所作一篇依韻

和之

彌月鑠蕭寺百念損心曲開門春山青舟備春漲綠回首戲事空白黑掃枰局却憐別銀燈手纖腰素束勸我金屈卮陽春詞非俗歸心千里馳客飲一笑足况我富

朋簪連檣泛寒玉夜泊子陵灘清輝耿相燭

衙守作席諸妓分立

諸客前各唱一詞雜然並奏時當予前者唱別銀燈偶差妙麗故以戲諸同事

用當時韻題釣臺呈諸友

釣臺兀層巔釣鈎應不曲豈曰真釣魚愛此千頃淥戰
爭如奕棋光武偶羸局先生靜觀之未肯帶一束紛紛
揔兒戲齷齪付鄙俗萬乘等故人醉臥加以足誰能棄
天真俯仰矜執玉亘古纔一人卓哉理深燭

衢州試院次韻盛當時官長寵示二絕句

洗眼貪看幼婦詞玉人空遣暗相思憑誰為報歸期近
趁得桃花爛熳時

二

揮麈論天幸此同酒盃共笑夜爐紅共須速了公家事
相逐西湖泛暖風

次韻當時官長院中三絕句

柳嫩風摧綠花嬌雨妬香欲憑羲馭緩莫遣負韶光

二

檐鵲矜巢噪桑鳩喚婦鳴客愁饒餽釘牆外賣花聲

三

畫舸便春漲驕驄惜障泥歸歟何所愜烟柳子陵溪

戲呈吳江令張明達

陸羽甘泉冷似冰
松江因向令賢明
要須更取中橋水

欲看三君子鬪清

甲午夏公檄自潤還秀持惠山泉與達明書此代簡吳江第四橋自古傳

取水處明達得詩因說脩橋日惟是橋下柱不得凡兩
日後用鐵裹柱頭如錐狀方下得定蓋其下皆有青泥
滑而水急當泉湧處也是日達明招飲于垂虹亭因遣
人取水較之水輕甘于惠泉余戲達明曰水則勝矣但
未知令如何耳二人相與掀髯盡醉而後歸然惠泉雖
味淡而體差重以石置器中可經歲不壞居無幾時朝
廷有旨月進雖為禁泉品之居上
豈正以其不壞耶惟淡不壞耳

丙申春貼子八首

北斗寅初建東郊氣乍迎土牛敦歲事綵燕動春情

二

簫鼓迎春至烟霏向曉開棠陰聽訟罷莒葉勸畊來

三

令節年光換和風春令行野塘初變柳幽谷未遷鶯

四

土牛分盡綵泥香動地歡聲入壽觴倍覺今年春意好

上元燈火鬪風光

是歲上元

五

碧波樓下銀塘晚麗日亭前瑤草新和氣滿城催燕樂
風流太守最宜春

六

暖風漸綠池塘面和氣先薰花草心欲識春來何處好
曲屏新稱畫堂深

七

繡閣佳人拂曉粧爭持春酒賀春陽鬢雲總把梅花挿

簾幙春風一種香

八

金裁寶勝翻珠髻雲染華箋貼繡楣庭戶春歸何所覺
暖風吹雪下瓊枝

賀知府毛檢討生辰

祥光曾射斗牛墟想見當年吉慶符天遣麒麟來玉戶
史占昴宿下雲衢揚鞭禁省聲華籍擁旆侯藩治狀殊
妙世文章燕大手致君才業魯真儒英姿冠玉使揮麈

雅座生風謝舞雩寒士幾人懷衍律窮民比屋頌廉襦
寶燠共獻詩千首煩暑潛消酒百壺珍重公歸廟堂後
老人長照帝王都

賀王通判生辰

銀河光動昴星躔妙歲聲華已赫然青瑣雄文天外鳳
白虹豪氣飲中仙難攀驥足騰千里曾許驪珠探九淵
會看黑頭丹袞貴伊周勲業老彭年

送毛擇民

霧躔曉色風冷冷滄波漾縠旌旗明畫舫疊鼓不可挽
一城攘攘心爲傾城中老人爲余語我公道來能幾許
朝家借不恤吾人以我公歸欲焉處惟公立德清而通
惟公御下嚴而容文章光彩瑩萬古二十八宿羅心胷
高標不受俗塵涴唾手功名猶坎軻思深謾結千里愁
見晚端聞九重賀官僚有士轅下駒感激剪拂鳴肌膚
瑤池一夕看奔逸惆悵未易追亨途雲龍風虎倏際會
回首可須論治最要將椽筆壓西清不負聲名燕許大

次韻王元衷見寄

雞爭本緒粒決鬪玄瞥改鷹隼方饑飛亦復一呼待誰
能謝蠅頭眼不挂兼琲但覺軒冕榮相高事風采而我
果何為潛游萬人海窮閭卧袁安朔雪落璀璨動死償
幸免天公復何憝江湘渺清曠雪景應好在因循成滯
留瑣屑因俗猥歲晚誤倚門居然此心悔青雲有勝友
勉我去鄙倍困憐塗中汗巾笥欲千載失身殉虛名要
等軻與亥歸歟筍蕨鄉夢寐春山採

與姚令生日題寶雲寺

年登五九百無成誰與焚香祝壽齡
濁酒一盃蕭寺裡清風猶喜對華亭

寄贈清涼院醫僧懃師

院有十全堂乃上官郎中命名廉留題壁間
道懃三昧起膏肓甘露醍醐散滿堂
况有星郎碧雲句坐令西域識清涼

題雙泉堂

叠翠倚崢嶸森然衆木榮
兩條寒玉迸一檻暑風清
幽意憑分瀉微瀾更合成
誰知闌闌裡扃戶小蓬瀛

題沈宗師雙鳧軒

高懷暫寄小軒亭池浴雙鳧
便借名島上飛時真得意
網中朝處肯留情靜同鷗鷺
窺秋淨閑伴龜魚戲晚晴
他日和鳴烟浪濶主人端亦
在蓬瀛

後聯一云屏巒屏
立何妨久容雪相

看一種清池中叠
下更有白鷺一枚

次韻酬游師道見寄

洗耳初嫌賸一瓢歸翰今媿遠從遼駒馳已是無聞者
鴈集何裨有道朝拭目故人三紀別回頭新貴九天遙
勸君幸遂田園樂莫遣心旌取次揺舊與師道同學相別恰三十六年意
欲求書為江西之遊故末章云

題龍歸院一絕借壁間韻

門外青山玉作園溝塍連絡稻田肥多慙薄宦辜猿鶴

一換星霜始一歸

舊讀書是院

後十餘日別倫師赴臨章又題

瀟洒東陽笑十圍未應裘馬羨輕肥稻粱浪遣成蓬梗
遼鶴殷勤祇暫歸

題知漳州李伯安判院父祠堂陸惇禮韻堂在

福唐城中所居之背山巔

澄江一昔鯨翻玉春水年年空自綠長思豈但襦袴闕

社祭千家繞山足華堂香火煖生春月檻風櫺清楚魂
遺蹤孝慕幾時盡時見孤飛當日雲

古者鄉先生沒則祭于社李公卒于

娶或云

社也

題耕園鋪

鋪中有蔡君謨題佛桑花詩刻于亭中花適盛開因書云

下馬看詩句回頭見佛桑可憐空姓字留與木根長

山間早行題和溪驛

路入龍溪曉烟村暝不分水聲渾繞石山色半含雲掠馬驚飛雉窺人走駭麕空林惟鳥語深薦忽蘭芬谷暗吟蛙部崖蒼織蘚文野花紅復白相照自繽紛

題南墩鋪

雨中聞猿聲素所未識復度二峻嶺蓋亦創

見因記行役之勞云

見說龍巖路猿啼今始聞深林埋宿露高嶺出層雲天
去頭三尺崖垂足二分只愁雙目眩敢恃一杯醺捫厯
增泥滑瘡痛日向曛長安九軌道誰識此艱勤

題新嶺鋪

嶺高無所見泉冽不堪嘗獨有埋雲樹六月行人涼

題崎灘鋪竹

轟轟萬琅玕風枝帶露寒何當傍金闕天子御樓看
傍路

竹極多細瑣冗長無如此一畝瀟洒凌厲行列森然若
旦旦有理之者使人愛戀不忍捨去念景龍門新城中
移植方艱倘可全
致壯觀豈復有哉

又題

蔽日搖風碧玉林行人端為駐清陰可憐寂寞垂亭畔
爭得軒窻伴嘯吟

冒暑借壁間韻

白汗交膚不可衫濯纓空羨水如藍林泉學道平生志
末路嗟誰與指南

又借韻

海鄉何處是瀛洲
咄咄憑誰賦莫愁
衣袂可憐塵土浣
滄浪長憶釣魚舟

逆旅憩店茆軒

茅軒有何好
小駐客心寬
始覺安居樂
無如行路難

偶書

射獲原非虎
圖看未識龍
古來除夢卜
真得幾英雄

初冬再至龍巖過崎灘
閑竹之災弔之

凡木無端折大風玉摧成竹救無從我來急召隣翁語
爲護春筠長籜龍

琅玕縱橫顛木猶在意不能釋再用壁間舊韻
風育木蠹隨瑶林狼籍千竿翠碧陰憑仗鄰翁好收拾
盡教裁作鳳皇吟

天明美解非晚許以臺上假山爲惠小詩督請
百花臺上小蓬萊碧玉嶙峋照眼開曾念萱堂少佳致

不知何夕定飛來

天明宗室子字也臨
漳司錄廳闈堂名萱

廖傳道示旅中述懷借韻奉酬且相慰勉云

高軒慙媿遠相過道義談餘旅瑣多燈底自憐干斗劍
壁間誰辦化龍梭時來會中青錢選和寡空為白雪歌
好泮文鋒迎紫詔莫因賢梗歎蹉跎

又次韻酬廖傳道

未遇由來歎數竒梅花非早杏非遲祇因樂道甘懸磬
肯羨成功不用龜白眼固多流俗見朱絃獨有故人知
陳平豈解長貧困器業惟當自護持

寄陳厚之已亥歲赴闕發洪井道中寄

根塵積習亘須彌好事從來總未知蒲柳已驚秋向晚
膏肓長恐病難醫靜局五戶應無漏密註金輪會有期
感激至言慙復喜會當銘鏤絕邪思

朱藏一除校書作別竹詩次其韻與藏一直舍

切鄰實共此竹

庚子年
太學

晚窻簾捲雨初殘一點無塵碧玉寒霜節留公化龍杖
煙梢憶我釣魚竿坐令煩暑消餘烈遣窮愁釋百端

他日茅簷隱疎翠懸知無夢到長安

次韻盧駿給事試茶

春容未動柳梢頭寵賜初驚遠自鷗蟹眼翻雲連色起
兔毫扶雪帶香浮出塵香味端誰品無滓肝腸可耐搜
青瑣夜長應不寐珊瑚重見萬金鈎

初云詩情風月更相鈎

次韻潘義榮博士學中書事

樂育賢豪地誰令亦此來羣公嚴矩範正論掃氛埃濫
食還多媿明時豈乏才所懷真土梗只合棄牆隈

真州次韻酬丁夢符見贈

夢符名駒時以
職官爲楊子令

平生不許說功名可但人嫌薄命人松柏有心私自信
芝蘭無臭自相親只今我亦乘軒鶴何事公猶入幕賓
會看飛英霄漢上方知滿腹是精神

次韻向伯恭發句同遊西宮見寄

久客倦塵鞅薄遊憐寶宮論文欣得甫載酒媿非雄遠
岫入青眼長江來好風詩成故超絕千里看花驄

發儀真投宿山寺壁間見向伯恭留題因和其

韻時議開過明
河故有作

百年功利要深思力屈才殫悔恐遲萬斛行船今足矣
千尋鑿石古無之謀疑箕子陳洪範放闕周公豈我欺
安得使軫虛採納免將無益害三時

次韻酬崔尚德檢討見寄

大學時只
居直舍

規營端欲老漁樵尚着青衫底百僚長占廣文眠雪夜
分無金谷度花朝多慙軟語憐根鈍縱與香名奈實聊
四海如公今有幾交情不逐歲寒凋

次韻酬王元衷郎中兼簡夷仲學士

大學日秦夷仲名坦

萬里端塵鞅，栖息寧重論。相逢一笑樂，妙語如春溫。謂我鬢顏好，包巾已霜根。問我田舍何，抱甕猶欠園。跳丸轉光景，歲月逝水奔。豈無究竟法，汗漫要窮源。柴桑公闕里，此意今故存。誰云王謝家，流風但清言。並遊芸閣英，詞辨江濤翻。久不一見之，清思濯襟煩。青冥雙鳳舉，媿欲欺山樊。勉哉適其時，雲蓋天無痕。

中秋夜宿光州陳寨驛

南來無侶路三千八月荒村看月圓獨酌不成眠未得
靜隨寒影落天邊

題蔡州柳莊鋪

雲垂曠野路漫漫策策秋聲作莫寒已分故園天樣遠
不知何處是長安

題鄆陵縣驛

區區望京國京國何爲哉林泉佳處不肯住塵埃窟裡
甘重來此生何日遂所樂擾擾隨俗真堪哀

卷十
次韻鄭覺先冬夜圍爐示同舍

碧瓦初寒夜紅爐擁邃亭嘯吟元俗調商榷見全經共
擬蛾成蝥誰憐草花螢疚心男子事燈底看青萍

送別城西有感簡元顯

辛巳季春送妻党入蜀別離傷懷兼悼元吉
之亡

前年出城西祖餞長者轍綠髻豪偉郎還鑣共炎熱蜀
道非天涯暫離非永訣况乃赴官期留者思奮決人情

殊易堪信未惡時節今晨西城出景物舊森列金蓮認
高樓感嘆成哽咽不見昔年人還爲昔年別此別異昔
年骨月心欲折此行異昔年哀蹇方析閱聊爲稻梁謀
途窘計所拙人生足憂患樂事多歇滅連年瓊瓦卷荒
寂人迹絕况我薄命人悲辛復何說

庚辰辛巳國喪

次韻李全甫惠茶蘼五首

零落殘紅鶯語歇荼蘼正是花時節金盤帶露剪瓊英
恐逐楊花舞飛雪

二

春意不隨桃李歇
香濃飄到薰風節
爲君鎮日守閑窻
絕勝當年映寒雪

三

寂寞王孫遊騎歇
香風何許追嘉節
故應金谷擁笙簫
獨倚玲峴架頭雪

四

吹盡柳綿香不歇
仙姿那把春爲節
枝頭疎蝶解尋芳

憶得仙腰舞回雪

五

脩竹弄風新雨歇
瑤英玉蕊攀高節
折來解惱北窗吟
只合閑拈映宵雪

重九書懷

幾年重九曾爲客
今日黃花特地愁
北闕歡娛雲杳藹
南州消息鴈沉浮
驚人節物應無奈
浪迹生平可但休
倚劍長吟樓閣暮
淡烟寒月不勝秋

和魏奉議九日夜飲縣樓

年登千室富桑麻誰似絃歌度歲華紫府賸延天上客
黃金同醉月中花龍山勝集成追感巴嶺新篇許拜嘉
倚徙更憐燈火市笙簫無數酒旗斜

送崔浩然主簿

平生才業笑時髦唾手功名晚未遭吏隱若爲酬寶劍

仙遊端欲探蟠桃八龍不斷聲華籍

唐崔同州生八子皆有才名世以擬

荀氏八龍浩然兄臺符有時名官兩制

三戟應留氣象豪

崔琳號三戟崔家

盡道

此行歸蒨鑑會看雲翮背天高

賀魏議生日

閩山家處鎖烟霞喜氣潛隨律報葭陸井效祥清骨相
梅丹呈瑞富才華牛刀異績聊千室棣萼英聲又一家
行看摩雲上霄漢定知仙種壽仍遐

賀周材雪詩

腊雪緣何喜春工屬此興宿苗沾潤足齧氣滌除仍亂
舞隨空遠輕黏徹體凝漫天紛糝玉極目皎鋪繒帶雨

聲初急搏風勢轉增危檐飄遠幕疎屋洒寒燈瑟縮鷗
栖怯跳梁犬力勝須臾平坎窞頃刻沒哇膝梅李看山
木瓊瑤數塔層寢眠寧有道賦詠媿非能郭履愁離席
孫窓但枕肱凍從金井水清挹玉壺冰銀闕何勞問雲
臺取次登漁蓑真好畫柳絮足多稱粟冽驚殘歲淒其
憶舊朋戴君聊欲訪郢唱忽難應綺席交銀燭清河映
玉繩詩成凌鮑謝酒飲竭淄澠天朗醒孤鶴風高激怒
鵬齊宮初入夢曉鼓數聲鑿

再和

聞說長安少祈求，廢寢興精裡。俄感格飄舞遽，縈仍剪
水瑤花怯。搖風柳絮凝，共忻田有麥。誰念客無繒，灑迴
春思潤。侵窻曉色增，路漫三徑草。光掩九華燈，棲鳥渾
無託。漁舸漸弗勝，岡巒徒見隴。阡陌不留滕，庭玉堆盈
尺。臺雲疊幾層，因袁那有意。飽武亦何能，斗帳愁孤枕。
圍爐憶並肱，攜瓶閑煮茗。坎地學藏冰，周雅何妨詠。燕
山詎可登。

古人云燕山雪花大如席

齊宮當日景，謝句異時稱。抱膝

愁無侶傳箋喜得朋
郢歌元獨妙楚曲更相應
跛足慙

追驥凡材強就繩
汗顏從奪錦痛飲欲臨澠
喻問懸荀

鶴虞絃動沈鵬

杜荀鶴叙雪寄喻鳧云此時行逕無人迹惟望音巖問寂寥沈鵬雪詩云願將

高士曲來入舜綺彈

故應聊遣興布鼓豈鑿鑿

和孫逸道供奉除夜作

流光如轉轂詰旦又新年
律換銅壺漏春回斗柄天
守燈須徹曙分酒莫論錢
雪分瓊瑤化花看錦繡鮮
暗驚雙鬢改傍羨九官遷
俗禮還慵講從朝好晝眠

和逸道春雪

春雪未發春工淺
春雪濛濛溶翳日
華曉戶玉樓迷
舊燕曉村瓊樹點
寒鴉籠金不碍鶯
穿柳覆錦猶妨蝶
戀花憑仗東風吹
更暖桃源端欲訪
仙家

和焦器之春雪

曉色初凝帶月華
霧飛還見受風斜
紅芳未遍人間景
白玉先開天上花
迤邐郊園迷別塢
蒙籠春水繞誰家
會須選勝乘新霽
倒載千秋小樣車

送張曼伯少府歸長垣

薄宦虛名豈所誇，千金歸去舊生涯。
百齡慈氏顏猶渥，三任仙郎鬢未華。
鴈信已傳芳字錦，鵲聲應傍小窻紗。
後園春色濃如酒，明日輸君即到家。

又云紅杏雨餘香
還遠綠揚煙暝酒

旗斜嘶風匹馬無停
足春正濃時君到家

題白馬寺西軒

幽窻殘夢午，聲鷄犬吠人家。
草舍微惆悵，十年無限事。
又聽啼鳥送春歸。

次韻張必志秋懷三絕

夜雨陰風劍自聲，幾嗟牢落向江城。
冷猿秋鴈猶堪聽，一寸古心誰與明。

二

芙蓉池館酒盃殘，策策秋聲入夜寒。
月照蓬窻耿無寐，起看星斗一長歎。

三

千古文章一杯功名，誰是百無災懸知不改鈎如曲。

與子雲山歸去來

憶陳氏舊寓

數間茅屋冷如冰
久住與人亦有情
最憶蟠軒新種竹
夜深誰與聽秋聲

知點寄示入荊州學四絕句次其韻

吾屬生涯事事遲
規營端與世間違
等閑庠序消寒暑
准擬三年看一飛

二

泮宮風化自崑廊青珮雛鶯學語忙
慚愧薄遊聊有偈
不全無力贊垂裳

三

寒離北闕三冬雪暖破南州二月風
欲訪故人增感慨
霜蹄猶立馬羣中

四

月照星河織女機春風花草弄晴暉
楚宮臺榭堪尋訪
闕見容齋數日歸

知點所居
有容齋

次韻答張德夫二首

十年歸夢繞庭闈
薄分都緣觸事遲
玩水看山寧所樂
此心猶賴有君知

二

敢為驕驄惜障泥
煩將接浙問遲遲
直須日夜馳三百
慙媿吾人過月知

明應仲同遊湘西諸寺有作次其韻

幾年京洛厭塵沙
青嶂長懷沈子旂
一葦渡江遊客意

半巖營室梵王家

是時岳麓
焚盡初脩

高軒滿目羅詩匠

道林有
軒刻道

林寺字韓杜及唐
名士往往有詩

寶塔盈函貯佛牙

有佛
牙塔

不覺下山紅

日晚可堪重到杳無涯

次韻蕭昭甫同遊江東四絕句

山下煙光碧玉溪
竹間禪寂白雲扉
高僧久住清涼國
應笑風塵滿客衣

右寶雲寺

龍遊龍歸已絕塵
空餘頑石隱歸雲
當時一昔猶嫌久

豈謂虛名萬古存

右馬祖巖

高出雲端謝世喧
碧天秋靜鏡無痕
塵緣不向塵中見
聊與遊人洗眼根

右塵外亭

野塘風細度香蓮
碧澗雲深響玉泉
從此西湖不須到
淡煙寒月一天天

右天竺寺

再和

偶隨鷗鳥度寒溪寂寂禪關半掩扉翠玉萬竿迎曉履
欲憑風露濯塵衣

右寶雲寺

去來蹤跡等遊塵誰向蘆廬覓道根巖穴故應無別異
鐫題空有姓名存

右馬祖巖

林遠渾無鳥雀喧山青那覓燒霆痕三千眼界雲霄上

十萬人家草樹根

右塵外亭

好山堆翠擁金蓮
花屋籠雲傍石泉
秋沼英蕖半開謝
直須饒占一壺天

右天竺寺

撫州試院次韻王元衷上元作

簾垂永日小亭幽
時節驚人特地愁
萬井笙簫懷帝闕
一簷風雨寄他州
青藜定遣相輝映
綠蟻何妨共拍浮

不料蓬窓今夜月一時分付與高樓

是日風雨夜深乃晴

張敏叔生辰

渥洼從古產名駒想見當年夢吉符候協月輪周四極

史占昴宿降三吳文章直使驚天聽

曾作送朱神童志詩神宗稱賞

業端期列聖徒七葉珥貂餘後慶千秋遺慶足嘉謨星

軺蹕駕恩彌渥霜節才臨政已孚豈但平反無濫獄會

看調燮有真儒南州喜氣光千里東閣清芬薦百壺珍

重公歸廟堂後老人長照帝王都

王守生辰七月十四日

月華渾似十分圓，玉露金風處暑天。
虎節端光凌碧漢，龍臺佳氣滿晴川。
揚鞭省闈聲名籍，擁旆侯藩福祿駢。
會看黑頭丹袞貴，伊周勲業老彭年。

次韻敏叔鬱孤臺作

一目江天萬里開，世間那有更高臺。
煙雲縹緲千山迴，島嶼縈迴二水來。
爽氣直疑侵斗漢，仙風應覺到樽罍。
南州已見澄清日，大筆聊從賦早梅。

次韻望闕臺作

妙齡聲價壓羣英，誰似青雲早致身。
帝闕日邊迷遠目，使星天上拱居辰。
牟心肯向江湖老，行律聊回澗谷春。
萬里夕紅歸去後，可能開府但清新。

一云霜節暫遲還
戀月星軺遙共更

尊辰白樂天岳陽樓詩云夕波紅

次韻奉酬黃承務見寄

孤標邂逅揖仙翁，白髮青衫道不窮。
斂板薄嘗清世祿，拂衣早慕古人風。
芝蘭一室紛囂外，冰玉諸郎顧盼中。

何幸新詩光枉教真遊應許叩鴻蒙

招康朝小飲不至以詩來謝次韻戲答

誰遣聲名速置郵不才如我自休休知君只慣紅裙飲
可是官身不自由

夢授訪及偶昏寢不見繼以詩來次韻答之

山城春色雨兼風誰訪揚雄寂寞中知是高軒應倒屣
妙談全勝夢周公

朱熙載會于洪井先解舟宿石頭渚以二詩見

寄一約同行一賀得子次韻答之

璧水相逢似夢中天涯蹤跡偶然同為君鼓棹吹長笛

誰似乘流更御風

舊與熙載辟雍相識是時六月末間見催欲趣南風行也

二

主祀傳家已倍遲便須真是桂林枝他年不媿瓊瑤贈

應被人言趣灶兒

祖父二十一歲生大人大人二十一歲生小姪獨不肖四

十二纜

生子

哭荆奴

將赴虔州

平生惟一女寶惜豈珠玉夫妻遮襁抱犢輒舐未足上
天胡忍予譴罰不容贖沉痾遽汝縈微息竟莫續痛哉
傷我神恍若失飛鵠追惟百牽腸展轉損心曲憶昨將
汝歸萬里自荆蜀籃輿共先後百步能我矚汝母惜可
知擁坐甘躋跼長途亦云勞不覺度炎酷今後當遠行
闕門迷躑躅相看懷抱空將領但妾僕心折疑已碎泪
甚衝風燭念汝生少啼起卧潔絝謂當非凡孩豈料
兩歲促意余積不厘汝故弗為屬長江漂玉塵茲事未

免俗遺蹤僅何有腸斷髮毬綠情知東門達敢取西河
辱要識父母心吾詩尚堪錄

撫州次韻李成德桃李花詩

韶光端許見分明白雪湘雲意態輕天艷靜中迎客笑
靜粧閑裡照人清不教亂落從風惡聊看交加待月生
却憶後園應更好幽閨春夜若爲情

退之李花詩云明
月斲入都交加

次韻知府中奉登鬱孤詩

隼旆飛揚百仞臺滿城佳氣靜氛埃烟雲渺渺江流去

花木欣欣春思回
妙舞人傳天上曲
暗香風度嶺頭梅
金蓮影散蓬壺夜
餘興應留繼日來

同前和書事

聞說幽棲久鳳臺
白雲巾履謝風埃
三刀不是塵緣在
五袴爭教暖律回
金谷分無人載酒
玉京應有使傳梅
今看一舉登黃闥
絕勝河東謾去來

上提刑中散生日

二月初二日張叔元舜舉青州人

萱蔻梢頭春欲妍
歷山高下覆祥煙
祇今騏驥騰千里

當日麒麟下九天中渭早芬廷尉譽

中散常任大理刑部

集賢行

峻曲江遷

曲江自嶺南按察使君知集賢院事由是一再遷遂爲中書令

貂蟬奕世真

餘事願比靈椿賦大年

次韻酬純通判

靈椿長幸蔭衡門堦草何妨晚見春
駿種也知慙冀北
病懷聊爲釋漳濱
名家正恐非蘭玉
瑞世寧當是鳳麟
誰道添丁無足慶
競傳佳句一番新

戲贈萬花翁

武陵溪上萬花翁
花落花開醉臉紅
應笑誤遊塵世客
却隨風水去怱怱

戲謝萬花翁

萬花翁廣余韻作八句和者甚衆一日惠然
攜示因復和其韻云

風流那復有斯翁
端爲論文訪蜀雄
鳳髓欲追千古調
錦囊拚著一生功
看花想見頻揮玉
騎馬何曾羨着紅
聞道碧桃春更晚
歸鞭底事苦怱怱

題歸安寺

馬足車輪戀日闌，幾人高遜蹈家肥。
少陵祇爲趨朝懶

萬里雲山取次歸

余已亥歲自臨漳被命赴國子辛丑復自臺屬乞補鄉郡蒙恩假守蒲陽

癸卯將之官因訪輪公用前韻

次韻陳知點瑞木一首

薪斧寧參造化權，發祥瑞若剖符然。
天心默與人心契，字色渾如墨色鮮。
事類洛書今更顯，義稽高頌古難全。
願歸麟閣光青史，千載聲歌播舜絃。

次韻林吉夫朝奉共樂臺即事

一飛南墮羽譙譙回首清都萬里遙却幸開樽得雲榭
不妨攜客上星橋花明總照潘郎髻柳妙爭縈楚女腰
化國春城人自樂多慙前哲德音昭

題張延之覺寺亭

迷途非遠復靖節子其徒止水明心法行年見道樞儼
如還舊國端是得遺珠燕處今何事春風詠舞雩

廖常山人惠珠副以詩文戲謝之

至寶人所祕感君輕暗投還君祝君富不是薄隋侯

次韻和吳濟仲見贈長篇

我有茆廬傍林麓負溪映光千頃綠靈峯鐘磬敞金蓮
絕澗松篁瀉寒玉縈迴窈窕廓以容正可標名取盤谷
肥魚香稻不須致苦恨風悲無靜木

時在
服中霜蒲易折柳

經秋蕭颯髣毛眇兩目閑雲不雨空出岫謾說幽蘭自
芬馥低回還笑杜陵老堯舜君民厚風俗青萍飛躍鳳
鳴翔要待乾旋坤轉軸只今輿馬非我事拄杖芒鞋巾

一幅時時照弄摩尼珠
金色祥雲滿天竺
年齡亦復驚
晚晚不暇栽
松惟種菊
清冷池上景物新
幸得君詩三
反讀向來已分得
竒禍豈料更容僥
靜福天光下濟詔
語溫未遣安
豐慙考叔市朝宗
古惡風波公棹惟
憐初不欲經營
蛙角嚇腐鼠
往往竟同蛾
赴燭須知幻境本
來空況乃隙駒
光景促
逍遙物外復何疑
苟簡場中無
自足
昨宵星月蘸
虛碧
濟中正以新
池成見寄
行散遶堤方恨獨
竭來共語君勿遲
時許
相訪
想見風塵厭
追逐

贈圓照

圓照閔師作小閣于護國精舍求名於余且
索偈頌師喜談禪于士大夫間爲作栖真閣
三字而戲贈之云乙卯立春日高峯居士書
試說栖真是若何鐵牛安卧到新羅箇中消息憑誰會
古廟緣牆長薜蘿

赴工部日題信州玉南寺壁和韻

病憤無憑寫翻然試一來誰知丘壑性疇昔斗牛回

題臨漳臺

臨漳臺成登眺久之作二小詩戊午九月二

十一日高峯題

銀河一派接天來碧玉千峯照眼開我欲乘槎訪仙去
却疑身已在蓬萊

二

畫棟岩巖倚翠微玉簫聲斷紫煙飛凭闌萬里秋光老
誰會長吟久未歸

秋日牡丹

壬戌九月池畔牡丹輒開數朶賞玩不能已
因書以識之

金風浙瀝葉飛黃獨倚殊姿逞豔陽誰道化工無鑒別
故應竒特屬花王

別妙湛

妙湛徃遊雪峯諸山高峯居士書此作別
雲遊何所圖只爲一大事事了早歸來和我休歇去

詞曲

望江南二首送黃冕仲知福唐

無諸好方面鎮全閩千騎泛雲歸洞府三山明玉外風
塵依約是蓬瀛 賢刺史龍虎擅香名金花已傳當日
夢錦衣聊慰故鄉情和氣萬家春

二

無諸好金地遍重城烏石亭危千嶂合荔枝樓暖百花
明千里暮潮平 賢刺史來暮相歡迎終向鳳池朝紫

極暫依猿洞駐朱輪
風月錦堂春

滿路花和敏叔中秋詞

癸巳周守約敏叔來作中秋

雨霽烟波濶
鴈度隴雲愁
西風庭院不勝秋
桂華光滿
偏照最高樓
東山攜妓約古人
千里夜來為艤仙舟
明眸皓齒歌舞總名流
惱人情態物中尤
陽春一曲誰
把萬金酬
便好拚沉醉
此夕嫦娥共須著意攀留

望江南二首賀毛檢討生辰

柯山瑞雲路
玉橋橫六月天
香瓊藥秀
千年人瑞
昂星

明風露濕麒麟 廊廟器冰雪照精神
妙世文章凌賈馬 致君才業富姬衡
松檜倚青青

二

蓬山曉龜鶴倚芝庭 雲覆寶燠迷舞鳳
王扶瓊液薦文星 棠蔭署風清
人盡道天遣瑞昇平 九萬鵬程才振翼
八千椿樹恰逢春 貂袞矚公榮

草堂王生以妄想天降玉牌爲實事使有司求


之既又託以夢云戲作阮郎歸

乙未雲間舟中

月橋風檻水邊居畫樓三鼓初草堂收拾讀閑書起看
清夜徂 閑想像儘躊躇玉牌金字鋪夢魂縱有也成
虛那堪和夢無

次韻知點驀山溪

論長校短總是非閑譽光景百年中似難留長江東去
隨緣游戲觸寄高情西樓月北窓風鸚鵡樽前舞 故
人襟韻千里心相許飛騎趁花時正名園揉風洗雨坡
塤潏灑聊共醉紅裙陽春曲碧雲詞慷慨懷千古



高峯文集卷十

欽定四庫全書

集部

高峯文集卷十二

詳校官庶吉士臣李如筠

主事臣呂雲棟覆勘

總校官庶吉士臣何思鈞

校對官中書臣王家賓

謄錄監生臣陳炳

欽定四庫全書

高峯文集卷十一

宋 廖剛 撰

疏狀

天寧節進奉銀絹狀

莫非王土食毛敢後于貢輸共惟帝臣享上必勤于儀
物上件銀絹數雖不腆誠則有加願同野叟之獻芹請
效封人之祝聖

進銀狀

誕稱屆月當天德之出寧有大逢年宜方物之畢獻上
件銀縣官輕賦所入地寶不愛之餘輒因守臣之微忠
助用慶辰之繁錫

天寧節天慶觀啓建

星渚發祥協千齡之休運露囊標節傾萬國之懽心皇
帝陛下寶祚稱昌皇圖增固福如川之方至德與日以
俱新長居北極之尊永比南山之壽

天寧節天寧寺

月建迎祥榮發先春之草木虹流屆節慶均率土之臣
民恭仗佛來仰祈睿筭皇帝陛下伏願乾行不息離照
長明壯大業于山河茂休功于松柏四方丕式儼北極
以俱尊萬壽無期與南山而並久

天寧節進功德疏

天祚元聖運膺火德之隆候屆小春慶浹虹流之大萬
靈稽首四表傾心恭惟皇帝陛下帝武儲祥河清協瑞
圖治百王之上收功千載之餘日月逾明山川增氣涵

養既均于普率，懽呼靡間于邇遐。執玉稱觴，一華封之祝望雲；就日人人，天保之歌。臣竊守郡章，阻趨朝守。遙跂鴻鴻之列，曷勝螻蟻之情。

又天寧節啓建

應鍾鳴候，華渚流輝。誕節屆期，羣倫胥慶。敢憑清淨之果，上贊龐鴻之休。皇帝陛下，伏願日月齊明，乾坤並久。四方丕式，咸歌天德之寧。萬壽無疆，永效封人之祝。

天申節別道場功德疏

天命申休屬真人之肇降斗杓建午符炎運之重興盈
朝天保之歌率土華封之祝矧聯榮于法從實倍慶于
常情敢憑元妙之祕文密贊延鴻之睿算皇帝陛下伏
願堯雲長覆舜日彌明兵強乎道德之威無思不服功
配乎天地之大迄用有成豈惟壽考之萬年將見本支
之百世照臨所逮祈頌惟均

天寧節滿疏

上聖篤生居域中之四大羣倫咸戴期天子之萬年用

謹焚脩俾申贊頌恭惟皇帝陛下龍飛乾健日麗離明
人歌下武之繼文世仰重華之協帝萬邦無斃庶政惟
和雖山川草木亦裕如暨鳥獸魚鼈而咸若河清應千
年之一嶽聲呼萬歲者三率土歡心殊方稽首某等備
官下邑際此慶辰仰瞻天德之出寧願效封人之請祝
祈天永命與國咸休螻蟻傾誠全賴金輪之法力箕翼
介壽益隆寶祚之皇圖矧多歷年惟甚盛德宜有神之
克相率自天而降康壯大業于山河茂休功于松柏四

方正式奚北極之可移萬壽無期與南山而並久

太上道君皇帝升遐

龍去鼎湖莫返飄飄之馭澤涵寰海難酬履疇之恩欲
殫竭于哀誠惟依憑于勝果太上道君皇帝伏願證一
乘法離六欲天恍惚神遊直指九清之宅扶持國祚永
隆萬世之基

寧德皇后上仙

十年從狩遽永隔于母儀九土纏悲痛莫深于孺慕式

報在天之德惟憑向上之誠寧德皇后伏願慧日照臨
慈雲覆護遊魂趨變永弗墮于天覺性不迷遂證成
于佛道

天申節漳州功德疏

斗樞流電夙開誕聖之祥龍藏披文咸薦後天之福慶
千齡之寶運同萬國之懽心矧曾侍于冕旒居常傾于
葵藿敢殫封祝上贊堯年皇帝陛下伏願配大乾坤齊
明日月四方丕式儼北極以居尊萬壽無疆與南山而

並久

天申節漳州進功德疏

虹渚流祥適屆朱明之候琳宮飭事虔申精禋之誠用
集殊英以薦多祖皇帝陛下伏願皇圖鞏固寶曆延長
秉德以承天心執中而齊民志羣方祝壽翕同嵩嶽之
呼萬國歸仁共啟葵心之向

天申節漳州進功德疏

樞星照野肇開長發之祥午日流輝默契重炎之運恭

因令節大啟真乘庶憑無量之福田仰祝延鴻之睿算
皇帝陛下伏願堯仁天覆湯德日躋克成莫大之勲益
暢又新之美申錫百祿式符天保之詩餘慶多男下副
華封之祝

天申節啓建

天命申休爰覩真人之降斗杓建午允符炎德之興彌
月甫臨敷天同慶敢憑清淨之果密贊鴻龐之休皇帝
陛下伏願盛德彌新大勲極集變夸率服誕恢禹迹之

疆福祿來崇遠邁周王之壽

請法真開堂

皎月流空千波一色春雷動地萬物同聽倘非人天之
師曷正佛祖之位法真大師智覺最上士生死那畔人
絃外希聲寂而善應鼻端妙斲巧不虛投坐斲十方蕩
盡辟支渣滓放通一綫迴然菩薩津梁舊店新開不離
當處借場作戲俯爲時流象駕速臨雲緇齊仰

請法印開堂

五采既彰孰知正色八音競奏莫辨希聲由來從空說
空大抵似是非是須拈禪病始證佛心法印大師此一
大姻緣實爲善知識太平曲調傳來三昧門中萬善道
場坐在千峯頂上言雖無味不落羣機物則有求何妨
泛應亟登師位共報君恩

請法真住本覺

玉兔日中莫非不死之藥火籠窟裡長存無盡之燈也
應為病加醫還須將明破暗法真大師具正法眼印古

佛心壽山昔年曾傳茲事嘉禾今日共指當仁祖令載
行家風猶在敢冀慈雲出岫寶月現空全提陷虎之機
妙展降龍之手毋勞辭避迺副歸依

請靈芝深座住首教院

心本無法法以心傳道不假言言而道在離文字者適
封于斷見捨因果者或墮于頑空閑示正宗實資善教
某人道心水止戒體珠明寶藏真詮深入靈芝之室金
篋妙解足追賢首之風願聞圓覺之音共證菩提之果

雲緇肅俟象駕速臨

請章法住廣惠寺

慧日流暉千燈競續慈雲布彩羣目增明由來的的真
筌兀屬堂堂大士某大師圓機夙悟密印早傳不動道
場初無去住太平曲調全籍舉揚章法法章已覺馨香
滿路廣惠更看功德無邊願副輿情來正師席

請資聖開堂

心本無法法以心傳道不假言言而道在雖近甜邊說

若何曾醉外求醒不落羣機是惟作者長公悟空真筌
夙契密印潛提擺臂萬法叢中埋頭千佛會裡遮藏不
得漏泄已多法鼓聲雷共聽太平新曲調慧燈續命欲
看資聖舊家風猊座速登雲緇齊仰

圓峯庵法堂成散燈

峯巒勝境殆神物之秘藏香火善緣適衆情之歡喜經
營所逮財力競捐荆榛忽變而華堂鐘磬俄傳于幽谷
瞻依有地傾一方之信心福利何窮憑千年之常住

變教院作律院

寶藏真詮如來實際倘行持之不至將誦說以徒勤秀
才教風熾然甚盛南山宗旨蔑尔無聞當得嚴師舉茲
勝事某人道心水止戒體珠明師子英聲久著靈芝之
室金篦妙解豈資賢首之功願聞圓覺之音共證菩提
之果雲緇肅俟象駕速臨

青詞

脩解字畢醮謝

漳州司錄

太乙含虛有求皆應至神妙物靡間不通敢以微渺之
詞上瀆高明之聽伏念臣為貧而仕就養云來適茲頽
敝之居將有覆壓之患是用徹其棟宇咸與惟新易乃
井庖器非求舊尚慮工施畚鍤蟄類多傷聲振斧斤地
靈失據爰仗脩持之力少伸慰謝之誠庶令喜懼之雙
親載安斯寢亦使賤良之百指罔有他災朋來穀旦之
吉祥袞去積年之厭穢仰祈鴻造俯鑒精衷

甲辰保安醮

太乙含虛有求皆應至神妙物靡間不通敢以微渺之
忱辭仰瀆高明之聰聽伏念臣父年齡垂暮疾疢交攻
既損復增方喜而懼應是塵緣業障積有罪愆不然惡
曜灾星適臨命運謹洎穀旦薰滌齋壇虔命羽流敷揚
法事伏望昊天上帝本命元辰金闕高真璿霄列宿霓
旌絳節擁仙馭以來臨玉軸琅函鑒冲科之懇禱所覲
真風銷慝大德施生蠲除既久之病根增益方來之壽
算期願是望倘符人子之心從欲斯昭永荷天神之貺

乙巳保安醮

碧落雖遙無幽不燭丹誠倘著有感必通敢以微渺之詞仰瀆高明之聽伏念臣父年齡垂暮疾疢交攻既損復增方喜而懼臣妻張氏稟性孱弱遭數蹇屯粵從年歲以來仍爲風疾所苦深慮有生災厄皆闕上象照臨輒憑齊潔之精祠覬獲聰明之降鑒伏望璿穹列宿金闕高真廣佈慈悲曲垂庇佑賜以康寧之福銷其罪悔之懋白髮慈親享椿松之上壽黃顏病婦保蒲柳之餘

生大德無私洪恩曷報

祝聖設醮

太乙含虛有求皆應至神妙物靡間不通敢以無愧之
詞仰瀆蓋高之聽皇帝陛下與天同體亘古莫倫伏願
保佑惟純眷顧弗釋福如川之方至德與日以俱新長
居北極之尊永比南山之壽

記

滌軒記

嘉禾儀參之舍前臨市衢背抵城堞其深可百尺許聽
事堂室並設其廣僅少侈焉廳之北有小軒方丈迺余
燕息之所東西之隙爲方沼二其中疊石爲峯巒植以
花木森蔚可愛塵囂所不到也然皆前人之所遺而予
無力焉癸巳孟春既至官問所職則兵民陳新之出納
帑藏貨布之支移與夫屢肆貴賤百物杪忽之低昂必
求平焉是其日晝昏翳吾之清明塵垢吾之虛靜者類
亦多矣不必簡書恐辱之參乎前也且澀而不緇動而

不括聖人也吾清不足以律貪修不足以化污潔已而已者也其可不思澡雪其身心疏鑰其志慮而顧役役於無益之緒而後其真哉於是退而省躬以休心焉則每盤礴於是軒而名之曰滌云蓋聖人猶有所謂洗心退藏於密而況其餘乎而況於我乎然常自幸生太平時天下之休戚利害非所過慮而駑散長物已分無所可用故得喪非譽不復入於胸次則吾之所滌用力蓋亦寡矣噫此直寄焉耳且將濯纓清流洗耳幽澗遺萬

物而一大滌焉庶幾乎游於淡泊之境以休吾生顧欲往而未決是其朝夕之所念想而媿焉者也政和三年二月日記

環翠樓記

余族兄蟾字元明生一歲而孤其母年纔二十幽處閨闈以終婦搢族罕見其面今且五十餘矣元明事親始被慈訓業進士既冠不利慨然歎曰吾獨一身安可一日棄吾母而從朋友游耶遂不復應鄉書惟家居事田

圃間以文史自娛恭爲子職而已母年益高愈思所以奉餘歡以報其幽獨之志迺於紹興乙亥即所居之西山爲樓于其上由北堂之寢室紆層梯而登焉一日特遊其中八風俱來四面皆暢慈顏爲之悅甚顧謂元明曰登高如是樂耶青嶂屏圍茂林雲合嵐光霽色鬱鬱蒼蒼而照吾樓者皆平居所未見也於是元明感其意因以環翠榜其顏嗚呼環翠之名世或屢聞若其所以爲環翠者未有茲樓也長歎世人奔走名利長年不見

其親者多矣安知茲樓之樂哉其餘妙景絕致當付騷
人之手姑叙其所以爲樓之意云

寓軒記

穀孰雖要縣民淳俗靖素號易理某郡某公復以兼濟
宇宙之材來爲之長宰办力餘束矢不入焉所勞其心
哉園扉草長五柳風細申申乎天天乎同燕居之日矣
一旦掃東廡之舊軒移花植竹羅列琴書召余坐而謂
曰子知斯軒之可寓乎曰然子知吾之所以寓于斯乎

曰然琅玕轟轟翠色盈庭錦綺離離春光滿檻夏披薰
兮之清風冬暴溫然之愛日文史歌嘯惟意所適故斯
軒之可寓也矧乃年登民阜千室鳴絃化洽風移三異
彰德公之于此上不辜明天子之所畀託而下盡爲民
父母之道挾是意而寓斯軒其樂可勝計耶公曰吁若
子之言猶有待而然者也假于物以爲足依于人以爲
安終亦失所寓矣子特見吾得所寓而樂未知吾之所
以寓于斯之意也子其接于人而係于物而後其真歟

試爲子言其崖畧夫一身之外皆可寓之地一性之內皆可寓之意天地雖大孰有餘于秋毫秋毫雖細孰不足于天地蓋不必登長途而後遊具茨之山浮滄海而後至莫大之國默而會之雖環堵之室閉門却掃而所欲寓者了然載于目前矣然則果有待而然者耶故吾之所謂寓寓于此非寓于彼亦非資彼以寓此也若以寓彼爲得所寓則崇臺麗館耳娛而目悅者斯可以爲寓矣若以資彼爲得所以寓則東府西樞志行而意得

者斯可以爲寓矣奚有如是而我獨樂乎余于是避席而謝曰僕益矣昔聞以形寓今乃知有意寓矣顧以是名公之軒可乎曰諾雖然吾固謂子隨所寓而寓矣尚何獨于此名乎吾將隨所居而揭之子其爲我識吾言而告諸客余于是爲之記

瑞棠記

臨汀州治之後圃舊植海棠一株叢生而大高且二丈餘有斷幹焉去本數尺而枝葉敷茂華實以時交加叢幹

中初弗之覺老圃為余言曩取斧柯者戕之于茲五年矣迫視之膚理預結鋸迹幾漫宜若是其既久也異哉此獨何理然耶夫物之托于土者稟或有異如麥之兩岐穀之九穗或殊本而枝連或別畝而類合發其根或得人物之狀辨其理或成字畫之文神奇瑰怪尚不可殫舉豈無自而然哉雷風之所動化日星霜露之所感移寒燠燥濕之所變遷彼其巧妙功深抑土之氣實滋焉以成之者也今是幹也薪之偶未束耳陰陽造化無

所施其妙用有槁而已而屆茲嚴栗萬木雕落之時乃始津津然獨葉其杪是何耶余每至其下未嘗不徘徊注想恨欲詰之而不可得然吾聞之玉韞山輝珠藏淵媚雖神聖之所存妙萬物而不測昔定光佛現相茲土靈異之迹特著今此棠正植其祠之前豈此翁招泉涸溪訓槎剪石之餘戲耶命工圖刻于石置祠下庶與諸靈迹並傳不朽云宣和四年冬至揖郡事延平廖某記

龍沙廟記

交溪南北爲靜安里溪北之人歲時奉里社于溪南之
嶺表不知始于何年率夜半往待事于祠下雖甚寒若
大風雨無敢改也或不得時渡而奠獻獨後往往舉家
惶懼以爲一歲不滿之事余嘗怪之頃因會諸耆老而
語之曰里有社初無定所亦各于其井廬之間為之從
其便也惟溪北人烟實強半于溪南豈不能築一壇以
爲祈報地顧必登舟涉嶺而後以爲勤耶父老矍然咸
曰曾弗爾思第見所從來久遊以爲當然耳因復謂曰

社神必立妃配姑置不論今嶺表乃有二神像與妃而四列坐堂上莫適為尊遽傳以為兄弟二人而已莫知其所以祀是獨不可分于南北社乎且余疇昔嘗夢遊瑩林龍沙之間見廟宇甚設今猶彷彿於心吾党之社豈此其地乎試相與行相之果得爽塏焉卜之而吉乃使詣祠而請曰願輅神像一軀與妃為溪北地主一正廟貌庶幾少於禮典神聰惟聽亟蒙印可於是無小無大歡欣歌舞相與捐金出力惟恐其後不再月而廟成

乃消吉備禮而遂遷之焉實經始于建炎元年八月而奉安于十有二月壬子也凡為屋二十間神御曰堂廟曰靈感神君著兆於夢也左右前後四山特高大而對峙溪流直廟以來朝蓋山水之佳處也門庭嚴邃繪圖森羅里人瞻仰肅心有加遂為子孫百世不改之祠夫亦豈偶然哉

圓菴記

圓菴者高峯居士之所建也高峯之南交溪之北有山

敦大而圓淨其一方宛然如基可受屋廬蓋山之東也
正面一山亦復圓如覆盂碧澗道其下而南驚左窮山
源則羣峯如擁瀑飛絕磴莫知所從來之遠近右睨谷
則山回路轉蔽合如障雞犬烟村繞百步外而窈窕深
邃若與世隔惟茲勝境殆神物之所秘藏不輕以畀人
也居士生長山間自爲兒童時頗知愛之逮宣和辛丑
既倦於遊驚幻泡之餘齡念休息於淨土於是始有營
焉卽其宛然之址而等級之爲門廉堂殿自下而升傍

啓軒窓散植松桂蕭爽凌厲遂爲一方精舍之冠自經
始迄今日增月葺乃至種種功德莊嚴殊勝若將歷千
劫而不壞夫豈偶然哉惟庵之巔與前山皆爲圓相故
因以得名而門俯澗谷高且數丈故前廠魏觀亦名合
壁爲其如日月之相通也谷之南跨澗爲閣榜曰玩珠
蓋是中有明月珠陰雨晦冥之夕徃徃去來山間光采
爛然照映林麓不知其幾千百年也閣之南因澗高下
留水爲池蓋兩山之址皆石壁不假疏鑿而成汪然瑩

徹可燭鬚眉故二池之間有橋曰臨清遊庵者路所由也凡是命名皆雖因其實妙義固存焉耳是故居士每一至止神朗心開山色水聲儼然如在靈山會上聽八萬四千偈言未嘗不歡喜厭足而不能以告人也或問居士法不孤起仗境方生無是庵者當復如何居士笑曰本覺圓成人人具足精真妙明如滿月輪如摩尼珠照耀大千隨取隨得是故居士既作是庵已因作如是觀居士爲誰順興廖某家於高峯之下故以自名而記

之云爾紹興四年十有一月朔也

題跋

御書三十二字

考校試卷當以忠正直言利害切當文辭富贍為上等
阿附諂諛文辭蕪累為下等

跋尾

紹興二年春三月甲寅上御便殿策試進士越翼日遣
中使持宸翰遍示考官以去取之旨凡三十有二字且

命留賜詳定官臣等祇奉訓詞敢不悉心以奉休德竊
惟理亂之機常在於聽納之際忠言入則正道勝而治
所由興諛言入則邪道勝而亂所由興人主悅諛而厭
忠古今一轍故治常少而亂多今陛下求言之誠擇善
之審如此用圖中興其庶幾乎詳定官左宣教郎守尚
書禮部員外郎臣林待聘左朝議大行右司諫臣方孟
卿左朝散郎權尚書吏部侍郎兼侍講賜紫金魚袋臣
廖某謹書

嘉興簿廳三秀堂記跋尾

人固有務為高潔以斗升為不足以委身而輕去之則他日冒萬鍾而不辭曾無足恠夫惟可仕而仕當已而已委蛇俯仰與物無忤而我常自若是謂知道之君子吾友才臣庶幾其進于是乎

郭傳師太尉曾祖墓銘跋尾

道家忌世將史遷以悼成紀人其言固有味觀汾陽特進公家節鉞相承方興未艾豈忠義之澤非可以世數

期而況代有似之故當不同歟紹興元年十二月五日
書傳師名仲為殿帥

戲題邪說辨尾

區區不揆譬之敵人擁百萬之衆似不可當然澶淵一
矢雖瘦輒羨卒發之夢寐間不害其能中也

續秦叔度所書喬君宜治朱氏事

政和中吳朱氏以花石幸浙江之西一花一石不問何
人之家朱氏蒼頭排闥而入以黃紙封之戒主人曰善

護御前物其橫甚于唐之五坊小兒于是高郵喬君宜知秀州海鹽縣朱氏蒼頭入縣坊僧將盡封僧舍之花石僧徒誰何之蒼頭呼其党箠擊之僧訴於縣君宜命捕蒼頭杖之檄朱氏朱氏大怒誣劾君宜君宜於是罷歸當此之時北斗以南一人而已士大夫高之嗚呼歲不寒無以見松柏事不難無以知君子君宜君子哉余讀君宜所編數類愛其讀書之多因叙政和罷官之事書之卷末高郵秦湛

秦叔度所書君宜治朱氏事余時官於秀蓋親見之凡杖十數輩不止一蒼頭耳方其為民父母仗理守正不畏彊禦以庇其下若是之力至於退而閑處沉酣墳籍則愬然若無意於世者其卷舒固有道耶惜乎不壽而死遠者大者遂不見於世數類之書且傳後人徒知其博學而已良可恨也延平廖某書

古今通系圖後序

古今人常患史牒浩渺詳首罔末舉其中而遺其上下

弊精瘵形白首鉛槧之間初若泳諸溟海四無涯涘恍然莫知所從出雖明珠大貝異物深錯烏能盡攬而有於是始為之圖錄以提其大要者多矣最先唐劉軻為帝王照畧爰自太古訖於當世比聲成句纔盈千言而興亡世數歷歷槩見國朝司馬溫公亦嘗有獻於神考皇帝畧虞夏商周之史世俗所習知者而斷自戰國至周之顯德凡千三百六十有二年小大之國存亡興替悉繫之年號歷年圖抑又稍著理亂之由而更足為世

鑒者也頃年書肆所鬻有五曰運統紀曰帝王紹運曰
列聖節要曰古今易覽皆為圖焉雖詳畧不同經畫小
異要有意於參備不為苟作建安邱與權出入經史為
閩聞人出已意為古今通系圖莫知與四者之作孰先
後觀其編次纂繫連屬上下數千百年條理辨晰粲然
洞照畧而紀之蓋又非數者比也然與權初為書帙刊
之未便於覽予因暇日更圖之為五軸朱畫以辨正統
一縱一橫曲折而下離者卒合斷者復續列之壁間連

連乎洞眎古今而無有滯礙者矣復摭傳說稍廣其載
國名主號皆為詩以次之非敢為勞姑因邱而善其事
耳

書贈馮生

世之名技術者類多異端末習徒以投好流俗初無補
於名教惟圖象之妙獨能使孝子慈孫瞻仰恭敬儼如
逮事其所以慰藉人心無有窮也藝之不可廢者歟馮
君安民得此三昧未見倫比且能自持其術而不苟取

悅於人穎澤醜好直與造物者同坯冶於筆端而無敢
設焉茲可尚已建炎戊申余念高曾先世繪綵黜剥命
一新之蓋館之逾月而厭觀其能於其告行書此以爲
贈云

墓誌

夫人廖氏墓表

夫人廖氏余姑也世爲南劍順昌縣人年甫笄余大人
以其夙成擇所歸爲同縣謝氏諱賜之室爲婦爲母姑

為祖母凡四十有九年族黨內外無或議其短者以大
觀三年某月某甲子卒享年六十有四嗚呼亦不為不
壽矣而死之日舉鄉之人皆相顧駭歎以為如夫人者
宜其康寧長久蒙福未艾而遽止於此則其淑德懿行
著見閭里絜可知矣夫人性至孝余及記其居母喪時
泣血三年摧頓毀瘠徃徃過於先王之制既變除而日
月遠矣每見遺像若過墓必哭盡哀而止當諱之月則
卻葷酒而不御親戚話言間一或及其母之生平輒涕

泗被面語不能發嗚呼女有家獨慕其母終身不替有
如夫人者乎吾未之見也夫人豐肌端貌凝重而柔簡
惠和而簡靜其訓教子孫區處家事語法而不復親戚
之所爲有非是必面折之無後言故小大欽矚對之莫
敢罔笑語嘗惑於疑似之言怒甚余適在側以理譬之
隨語釋然蓋婦人而有剛正之氣敏決無滯礙亦未有
如夫人比也子一人元海孫男二人師古好古孫女二
人皆適余之族子以是年十二月塋於婁杉鄉會仙洞

之原閩中無族墳墓者唯謝氏畧倣古義得高曠地始會其先藏焉而厝夫人於其始之右以其序也元海事其母亦克有聞方夫人之終余適官食他方以不得臨其喪爲恨蓋十年然後歸見其孤感念疇昔愛憐撫存之厚相持而哭以至於慟既而相與視其寢室屏幃茵簣盥櫛薰澤之具各設其所如夫人無恙時則又喜謝氏之有子能致孝於其親愈久而益嚴夫人後日庶乎其不泯也謹書其實揭之墓側使來者有考焉

太宜人蕭氏墓誌銘

太宜人故贈朝散大夫廖竦之妻朝奉郎前充建州錄事覺之母姓蕭氏建州甌寧縣麻溪里人也父勝母吳氏家世農桑弗仕而太宜人生右足有黑子明甚父母以爲異年十七擇所配以歸大夫公公少失所恃太宜奉其舅以孝助其夫以順治其家以慈和勤儉閨門之內雍雍穆穆罔有間言太宜人有以輯睦之也生子二人長曰與以疆敏家事次則司錄也紹聖中以儒學登

進士第起家授之職雖曰大夫公而太宜人誨導之為力
用皆底於有成大夫公先太宜人十有二年卒太宜人獨以
眉壽就榮養凡三遇恩霈以其子累封至太宜人宣和
二年十二月乙未終於建州之官舍享年七十有八初
未嘗卧病前二日微有寒疾翌日盥櫛如平時再夕遂
長逝年雖高聰明強健少疾疾又其子孫皆進進自勵
人共榮之以為太宜人所積致也而猶雅自貶損紡績
之事每親之不倦有止之者則曰此婦事也弗勝無可

奈何幸能之焉用廢蓋自幼迄老如一日平生雖未嘗
觀書而動契禮則靜謹寡言笑中外取式焉女一人適
進士馮汝楫孫男五人曰松曰梓曰惟肖曰久生曰處
仁孫女二人曾孫二人曰伯孫曰次孫曾孫女一人大
夫公南劍州順昌縣敦義鄉人也先塋其鄉之長興保
密山口之宗其孤卜以三年十一月申祔太宜人於大夫
公之右以太宜人之行狀示某求銘某惟同邑里於覺有
總角之舊太宜之賢蓋所飡聞其何敢以鄙陋辭銘曰

孝慈身之寶

勤儉家之肥

宜人有之

歆然自持

蘭芬瑛美

懿實則著

穆穆閨門

是儀是似

積厚慶長

有曄其昌

百千萬年

尚賁斯藏

崔左藏墓誌銘

侯諱某字漢臣世爲荊州江陵人八歲失所怙順事其母如成人既冠而母逝廬其墓三年瘠瘵痿塊竭心力於浮屠氏之法以爲追報由是以孝聞於鄉除喪益慕

古人立身揚名爲父母顯迺遊學四方逾江走辰州時
州將麒麟使張公璠一見而愛之遂妻以女神宗皇帝
即位張守德順例得廢子官奪以與侯曰如崔郎當不
負此恩再辭不應任且陳非志强之授三班差使俄慨
然曰臣子忠孝是職功名所借亦奚儒冠武弁之擇吾
知所以致吾身矣自是研涉兵法目擊心到論議宏偉
畧謝凡近識者竒之熙寧六年朝廷經畧河隍主帥王
公雅聞其才重之首辟掌機宜文字有所諮獻徃徃忻

納侯不樂處帳下數從大將景思立部兵趣敵最號有功異時第賞人人自列惟恐居後侯獨不以爲意或者恠之笑曰丈夫生明盛時方天子用武無竒謀異畫足以動上冕旒資取節鉞錄錄隨衆效命正償廩餼耳何功足云聞者愧服竟錄斬獲攻守之勞至三差班使累遷右侍禁元祐紹聖間歷吉撫二州兵馬都監左丞張公商英嘗為江西轉運副使力薦其能於朝不報性端介不善趨鶩故人亦鮮能知者卒以書年叙遷至西京

左藏庫副使崇寧五年寢疾卒享年六十有九侯為人風神整秀進止詳華忠信愷悌自其天性而沉機果敢有過人者噫其良將之不試者歟曾祖某祖某家富鉅萬為鄉豪以樂施聞父某左馳衛將軍母趙氏江陵縣君皆以侯贈張氏封長安縣君先侯若干年卒再娶曹氏封安仁縣君慈聖皇后之初從姪也子五人長曰振東頭供奉官次曰援左班殿直三曰抗三班借職次曰挺次未名女二人皆適宗子長右班殿直令淮次侍禁

不已孫六人之奇之純之邵之才之美之間女孫二人
以二年癸未十一月二十日丙申塋於江陵縣之後山
長安祔焉銘曰

惟孝與忠

有實其衷

神也克相

志焉則從

才高其倫

尚多不試

匪富我躬

以遺後嗣

崔氏慶流

其源在茲

我銘幽宮

示人不欺

高峯文集卷十一

欽定四庫全書

高峯文集卷十二

宋 廖剛 撰

致語 祝文等附

天寧節致語

華渚流輝協千齡之休運
需雲錫燕動萬寓之懽心
敢移擊壤之音上贊鈞天之奏
恭惟皇帝陛下珠庭擢秀
金闕降真日月出而天地明
龍虎作而風雲會五兵不
試六合承流一德享於天心
百樂生於治國殊方絕域

航海梯山戴白垂髻含哺鼓腹屬此誕彌之月況當大有之年寶篆香濃靄祥烟之芬馥綵山風細浮佳氣之鬱葱遙瞻魏闕以傾心請效華封之獻祝本支百世膺滋致之休壽考萬年誕受無疆之福某等叨居樂部濫綴舞行幸對賜筵敢陳口號

虹流電繞想當時萬萬人今壽域躋十莢莫開堯寶歷九歌功叙禹元圭需雲湛露羅簪綬脆管絲絃颺羽霓千仞壽山封祝意年年峻極與天齊

燕待知滁州郭舍人致語

鳳閣辭榮久憩鄞江之風月麟符傾瑞俄膺天闕之絲
綸驥得路以方馳鵬乘風而遽起旌麾假道老稚駢觀
賓主相逢聲氣雅合恭惟知府舍人西雖粹羽東壁靈
輝法言追典誥之醇道學造天人之奧暫屈朱轡之駕
佇瞻黃閣之登而我知府檢討牛小才餘鈴齋事簡雄
文殆無強對嘉賓適愜高情改館加遽備將迎之厚意
肆筵設席罄委曲之餘懽遂賦我心則降之詩迺歌客

無庸歸之曲況鶯花景媚值此芳辰羅綺叢深不妨沉醉某等謬當獻笑難避匪才上悅臺顏敢陳口號

汾陽幾世令公孫曾掌綸言代帝尊扈畢未從朝紫極郡符聊復駕朱幡須知榮貴南柯夢且盡勤渠北海樽更願滁人休借寇欲看勲德被元元

燕待陳觀察致語

歸侍玉皇季子回轅於故里爭迎綵旆買臣弭節於鄰邦英風幸覲於使華綺宴大開於侯國恭惟某官簪纓

世胄詩禮名流自結聖明之知所謂豪傑之士立談賜
璧再見封侯獻忠而帝命不違在側則天顏有喜出入
禁闈而勲勞益著布宣德意而風采可觀茲者衣錦還
鄉過家上冢旌旄照日壯觀湖山車馬盈門光輝里巷
假道復經於支郡駢肩爭望於台光我知府檢討厚意
嘉賓禮勤膚使金絲奏雅盛陳北海之樽豐羅綺飄香
盡出東山之妓女對此舒長化日何妨醉倒春風但某
等欲助清歡慙無妙技敢陳口號上悅台顏

皇華使者萬人英誰似青雲穩致身和氣一城迎綵旆
高牙千騎擁朱輪買臣被命聊辭漢季子應朝却入秦
歸侍玉皇難再見當懽莫惜舉杯頻

燕待趙走馬致語

繡斧星馳道九重之德意笙歌鼎沸洽一部之懽情恩
波動盪於薰風和氣融怡於綺席恭惟某官珪璋粹質
金石精忠持天憲於一方採民謠於萬里嘉猷入告無
非懷仁義以事吾君皇極敷言更賴能往來以迪彝教

我知府檢討龔黃政事王謝風流情重嘉賓禮勤膚使
芳樽酌醴備水陸之珍羞妙唱遏雲盡神仙之妓女某
等云云

使者星車自九天一聲天語萬人傳恩光曉月明旌旆
和氣薰風入管絃北海樽罍須酩酊東山歌舞亦嬋娟
按行况覺都無事倒載何妨作飲仙

燕待新知越州王中大致語

綸綍十行輟名卿於北闕虎貔千騎作巨屏於東州幸

茲綵旆之少留式展黃堂之雅燕恭惟判府中大奎英
毓粹嶽秀鍾靈貂蟬而奕世榮塗棣萼而聯芳俊域玉
堂金馬未臨鼇岫之三番熊軾隼旗聊佩魚符之五左
矧會稽之勝景實勾踐之名區魚稻富饒舟車衝翳望
鄰邦之鶴表脩故事於蘭亭探禹穴以搜竒泛戴溪而
招隱抑亦多燕遊之樂豈徒誇節制之雄我知府檢討
喜接英標願親談麈屬鈴齋之暇日撫棠蔭之新涼改
館加遽愧莫將於厚意式歌且舞聊以永於今朝某等

叨備伶官云云

畫船搥鼓疊烟波夾道爭看刺史過定有去思留剡水
已傳來暮到嘉禾籓垣暫屈元侯鎮鼎鼐終還妙手和
高會莫辭今夕醉兒童竹馬擁郊坡

燕待宮使郭舍人致語

琳宮仙客鳳閣朝英解符新自於名籓購宅遠尋於樂土
旌旄爰駐井邑生輝恭惟某官奎壁鍾靈珪璋瑩潔舊
歷紫微之妙選方須黃閣之大來雲闕九重未遂扶搖

而上烟波萬頃聊為汗漫之遊秀人歌亦既見止之詩
士論發無以歸兮之歎我知府某官逃空已久解榻特
勤莫辭稅駕之未安且慶銜盃之相過但某等云云
琳宮仙客紫微郎大筆由來遠擅場三接恩光傾弁冕
五花文綵照縑緙蛟龍豈久逃雷雨璉璧終須屬廟堂
莫惜當懽同盡醉主人龔召客常楊

同前

高秋氣爽樂國景長屬德政之餘閑適嘉賓之交至華

筵特啓懽意倍常恭惟宮使舍人翰墨宗工巖廊重器
舊歷紫微之妙選方須黃閣之大來脩撰中奉麟閣英
髦琳宮者舊踐華資而畧遍知陳高義以小休府吏部
名重烏臺才高蘭省暫虎符而出鎮時鳳閣以歸朝我
知府檢討義重盍簪意勤加豆笙簫度曲葱蔥佳氣之
浮車騎擁門嫋嫋高旌之動霞觴共舉玉塵交輝勝事
一時清風四座某等云云

畫堂開宴愜新涼燕舞鶯歌奉玉觴未放仙舟登李郭

更看賢守會龔黃三竿日照旌旗動千里風飄錦繡香
盡醉故應憐夜永高情莫逆話偏長

是日太守會三客
李夔脩撰郭敦實

舍人皆宮使楊
勣新知睦州

燕待知泉州鄭司業致語

金閨朝彥璧水儒郎分符暫守於鄉邦擁旆俄臨於賓
館故人相遇歡意倍常恭惟某官清廟希珍巖廊重器
早膺妙選遍歷華途秩二千石之崇榮增麟閣親八十
歲之壽歸慶綵衣我知府某官龍坂同登蓬山共直尚

憶玉京之載酒況當金谷之張筵痛飲何辭高懽難遇
某等云云

虎符分寄輟名卿錦纜牙樯繡水濱畫秀豈將誇故里
綵衣端為奉高親開懷此日樽中醉結綬他年席上珍
畫鼓不須催去棹清歡難會玉堂人

燕待走馬太傅致語

天禁九重將嘉猷之入告星居萬里當綵旆之少留禮
重繡衣樂張金谷恭惟走馬玉壺清質霜節重權懷仁

義以事君茲往來而迪教春風駟馬擁和氣以歸朝樂
國華筵況懽謠之載路應須盡醉始愜高情云云

使節星馳宿衛賢九重遙指覲天顏三春日暖桃花浪
萬里人歸明月船金谷高歡難會遇玉京還馭恐留連
明朝綵旆烟波渺莫惜通宵醉管絃

新知明州周龍圖知興化黃府判特排致語

紅旆爭馳二大都之刺史黃堂盛集三學士之高賓榮
動一時風生四座恭惟知府龍圖西雖粹羽東壁靈輝

獻賦蓬萊久濟風雲之嘉會擁符鄖郭聊作湖山之主人知郡府判桂籍殊英星躔者德肯去浩穰之天府欲觀秀絕之靈峯幸此經由適然邂逅我知府檢討雅敦風義況值俊遊改館加籩均被大賓之禮肆筵設席願交兩國之歡

麗日和風花正妍黃堂高會四神仙凌雲擅價蓬萊客遊必飛聲天府賢旆旆馳驅聊此日鼎槐調燮屬他年紅英趁拍莫教錯冠玉周郎正汝憐

燕走馬太傅大排致語

紅旆載馳道九重之德意溫詞曲逮洽一郡之懽情思
光動盪於薰風和氣融怡於綺席恭惟走馬太傅游心
墳典雅意朝廷懷仁義以事君茲往來而迪教星車既
轄無一夫之戴盆天語乍傳有千兵之挾纊顧此一方
之幸實推八使之賢我知府檢討喜遇嘉賓盛陳燕禮
文星武宿集鵷鷺於黃堂燕舞鶯歌出神仙於紫府
星車還自九天來應是明時重選才澤與堯言下宣室

人隨漢史上春臺
恩光曉日千家動
和氣晴雲萬里開
高會莫辭同盡醉
風流北海富樽罍

高麗使副特排致語

堯日中天八表被容光之照
周疆薄海三邦修底貢之誠
名王遙拱以傾心
聖主俛懷而促駕
肅將禮幣爰屬
偉人恭惟某官蓬島仙姿
紫微詞客才力雅周於器使
忠精不擇於地安萬里鯨波
泛星槎而上銀漢九重雲
闕占斗極而朝玉皇
歷觀吳越之山川喜見夷夔之禮

樂清夢已游於鳳沼仙鄉分遠於雞林矧漸華夏之風
素號詩書之國依光惟舊被眷特隆停驂幸觀於使華
授館故勤於主禮知府檢討夙虔君命大啓賓筵綺羅
飄天上之香觴豆極人間之品金絲奏雅葱葱佳氣之
浮車騎擁門娟娟高旌之動豈特一時之盛事將為千
古之美談某等幸對台階輒陳口號

方壺負嶠海中仙吳越溪山照畫船玉帛名王朝帝德
節旄膚使駐賓筵恩承雨露來天上武接鸞鷲指日邊

共燕需雲歌盛事願同文軌萬斯年

引伴致語

聖主天臨懷遠東逾於鯨海使軺星駕來迎北自於龍
墀聯鑣將極於漢疆弭節聊觀於周樂恭惟某官清朝
寶器明廷羽儀並膺眷遇之隆同被光華之選選擇而
使素英譽之飛騰容止可觀想遐賓之欽悅我知府檢
討夙祗君命忻遇朝賢玉塵交揮幸高旌之少駐金罍
滿酌當化日之方舒共樂佳辰寧辭痛飲某等云云

蓼蕭均澤九夷同萬里將迎禮意隆屬國未瞻都護節
列城先仰使華風清談會覺襟無暑痛飲何辭盞屢空
早晚回轅天上去已應聲價落遼東

祝文

春賽祝文

青陽睟發律應夾鍾祀事爰脩歲有常典惟神廟食茲
土吾民之所庇依時雨暘而殄災沴是神之福吾民也
以時稱禮敢不盡恭

七月祈雨文

炎威未斂穡事方中密雲屢蔚於西郊甘澤尚愆於南
畝穀價為湧河流不通是當昭告於靈慈冀獲俯從於
虔禱滂沱三日用將成歲之功鼓舞一方孰曰非神之
賜

謝晴文

比告霑雨幾失農時輒致忱辭冀獲休應果見羣陰之
伏旋觀赫日之升寥廓清明遐邇忻悅仰承靈貺惠已

及於斯民俯罄丹誠報敢忘於稱禮

祈雪文

歲聿云暮土脈不滋念匪動天之靈莫致封條之瑞夙
嚴精意願霈澤於同雲豈惟豐年實召祥於和氣

五閣赦祭廟文

朝廷鼎新寶閣渙浹龐恩式燕在天之靈爰及載曲之
祀惟神廟食茲土陰有德於斯民精意以告成釐實天
子之命也

諸廟祈雨文

炎威乍赫，穡事方興。雨澤稍愆，人情為慮。用涓誠於吉日，祈昭貺於高穹。西郊密雲，俄成甘露。大田多稼，行慶豐年。是惟神靈為此方惠，守臣幸蒙其休也。

謝雨文

比以雨澤愆期，輒申虔禱。果優霑於累日，大慰懌於羣情。惟神之休，其敢忘報。

諸廟祈晴文

雨澤過多適成霖潦郡民所賴實在靈慈敢伸再瀆之誠仰覬必從之福伏願天容頓霽雲翳全收庶幾望多稼之成且以寬牧吏之罪神其鑒之

諸廟謝晴文

霖雨過多居民甚恐比竭誠於嚴禱果蒙貺於佳晴杲日流輝致輿情之胥悅大田無潦致歲事之可期沐此靈休敢忘報禮

秋賽諸廟祝文

火流露降稼往穡來祀事爰脩歲有常典惟神廟食惟
舊吾民之所庇依致豐穰而殄災沴皆神之福吾民也
以時稱禮敢不盡恭

祭勾芒祝文

惟神職專南正德著蒼精首勸歲功實司民命用虔脩
於祀典祈陰相於年豐

奠謁先聖祝文

惟王集百聖之大成垂萬代之彞憲人倫之綱紀治道

之本根倘有意于維持而植立者殆猶出必由戶行必
遵途方圓平直之不能外乎規矩準繩者乎某竊守是
邦視事茲始稱禮來見蓋將推夫子之道是訓是行非
特循故事而已

謁諸廟祝文

某以天子之命假守是邦惟神廟食惟舊時雨暘而殄
災沴以福吾民是神之靈也是神之所以永有依也守
臣與蒙其休請自今日始稱禮來見敢不盡恭

祭文

祭楊龍學文

嗚呼鄭衛亂雅紅紫亂朱惟先生審正聲辨正色而不
顯其聰明者蓋五十年兮頽然其若愚濁流萬里會逢
澄清斯文晦蝕豈終不明惟先生也既七十餘而老矣
忽驚人而一鳴瞽者以視聾者以聽如久行而還家
如病亡之俄醒醫先生之起斯人於膏肓兮豈比功於
倉公之與越人嗚呼哀哉天子憶金華之語近臣薦龜

山之書使者垂及乎菟裘而先生已棄簪履隔泉壤而
不之見兮徒慟絕於諸孤嗚呼哀哉先生逝矣六經疇
依四海一老胡不遺矧闕里之末學辱杖履之追隨
兮嘗發覆乎醞雞想平生之儀矩兮微言在耳訪函丈
以何有兮望新阡而涕泗嗚呼哀哉非先生之門吾誰
適從兮亦孰知我之悲嗚呼哀哉

祭楊觀察文

嗚呼時數千載君明臣良公以忠亮荐膺寵光入侍宮

掖彌縫贊襄出奉使華德音孔彰惟閩之人獲庇何長
部吏以循小大率常賢悅羨鑑佞怯風霜珍貢以脩陸
海相望民弗之病財弗之傷凡茲懿勩實簡吾皇官高
位穹不容此方是令賢以斧繡傳芳尚期歸覲休命對
揚豈謂赤心空餘皂囊閩山蒼蒼閩水湯湯懷公之德
何日能忘卮酒荐誠惟公不亡

祭黃思賢文

嗚呼士患無聞惟公之賢兮飛英聲於寰海仕患不達

惟公之顯兮踞高步於巖廊敷聖教兮視九官之夔契
與帝制兮邁四戶之常揚方我冠於武部俄坐嘯於黃
堂謂勞逸之常暨終當膺大任展遠業兮納斯民於壽
康何彼蒼之難測遽即世於含章雖桃李之無言兮孰
不仰高風而慨慷矧疇者於芝蘭之室兮共短檠之燭
光懷斷金之義重念伐木以情傷嗚呼哀哉閩山故國
秀水他鄉欲往哭兮無從流涕筆之俱下兮寄永懷於
一觴

祭黃仁翁文

惟公溫厚稟德純明立誠行作士表文為時英克世其
家騰寔蜚聲克奉其身尊生踐形孔孟其學瞿聃其成
視軒冕如土芥等富貴如烟雲老而厭世寂爾歸真蓋
晝夜之常度倏存亡其異名公寔不無我尚勞生

祭上官戶曹文

楊字子進
邵武人

嗟我子進才高志堅困躓於庠序場屋者不知幾年備
嘗艱苦僅迺得官蓋折腰於升斗者曾未安席而飽餐

俄沉疴之纏擾永抱恨於重泉甘旨闕奉箕裘莫傳自
古賢士不遇而死亦多矣如子進其尤可憐樵川千里
旅櫬茫然尚期以平昔學問之所到釋人間之累兮道
遙乎極樂之天菲詞薄奠式寫永歎嗚呼哀哉

祭文叔文

我公之生劍水之濱我公之死漢水之原歷艱險以萬
里掩堂皇而歸魂嗚呼哀哉人亦有壽胡不公延人亦
有福胡不公全忠信愷悌足以得萬人之譽而僅沾寸

祿才能智術可以帥百萬之衆而莫薦其賢死一冗職
室如罄懸嗚呼哀哉軸折車壞棟摧屋隳公今云亡骨
月何依想音容之愈邈兮隔青天之蜀道悵鄉關之猶
阻兮指歸程於海湄極諸孤之荼毒遣行道以糞咨嗚
呼哀哉祿固有限死亦有地數不可逃命不可恚子各
有職公勿為累女既有家亦能無懟公其釋此以瞑目
我尚含哀而收涕卮酒荐誠惟魂不昧

祭黃可宗文

吁嗟乎流水逝兮隙駒不留奄忽何有兮風燈岸舟君
來而南兮氣干斗牛義冠壁水兮祿榮是謀豈期一旦
兮沉疴弗瘳斗室橫櫬兮孤燈照幽行路之人尚猶咨
嗟歎息而不休又況乎昆弟親戚之愛交游鄉曲之情
兮孰不涕洟之交流吁戚乎劍峯蒼蒼兮劍水悠悠君
歸不歸兮道阻途脩勿謂百年無嗣兮遺恨千秋勿謂
諸女未嫁兮雙親白頭有弟在側兮骨將汝收君如有
知兮願君釋人間之累兮逍遙乎極樂之遊

祭鄭無慾文

時在
莆田

吾母之黨昆弟莫存惟公與母舅姑弟昆念昔黌舍從
公於處自少及壯分甘共苦我竊科第公仍困躓晚乃
得祿詎償素志清節高義窮益可觀拿推木飽孤貧恚
歡持此懿行何福不介壽則幾矣所享安在前死三日
猶寄我書書詞無異謂病其蘇浮生無根倏然已逝情
親契厚寧不殞涕魂可歸乎旅櫬經從嗚呼已矣豈復
見公

祭王運使文

嗚呼世道偪仄士無縱鱗百鍊繞指孰非殉人惟公磊
落負氣挺然自伸不畏高明而克敬有德不勵小節而
厚於大倫蓋人之強為善者或載以偽而公之所以獨
行而不作者一以其真有才未試有言未陳天靳之壽
亦胡不仁惟公之於交兮斷金義重況與公以婚姻之
故兮情方益親奠此一哀寔傷我神

祭尤提刑文

嗚呼與公交遊餘四十年寬和粹夷吉德藹然晚乃益
親况聯姻婭公頃南馳我仍北駕睽濶之久適此皆歸
扁舟相從朝夕為期夫何書來告我以疾冀其有瘳日
遲一日凶問奄至遂隔死生有泪如雨如川東傾嗚呼
哀哉豈復會公如昔臨漳豈復見公於公華堂華堂鼎
新公遽永辭不謂如公而止於斯卮酒奠公公知不知
我亦老矣曷勝此悲

先祖承務墳祭文

嗚呼哀哉丁亥之冬拜違几杖飲食未減起居無恙謂
當還侍菽水終養無何訃音遽來贛上嗚呼哀哉誰不
抱孫如我何用得祿自飽箸匕不供況感鍾愛頗異季
仲喪弗之臨葬弗之送每一念及肝摧心痛嗚呼哀哉
吾家素寒絕無簪紳自我先祖積善行仁迺訓迺誨歷
我父兄至俾孱微濫叨仕名如墉有基如木有根豈不
知歸欲報無門嗚呼哀哉十年還家亦將幼稚初幸一
見久已隔世抱恨何窮拊心永媿卮酒奠哀庶臨此意

嗚呼哀哉

祭叔父叔母文

漳州歸

嗚呼哀哉吾父之黨惟叔與姑吾姑逝矣叔今又殂惟叔之戚次及其配復先半載亦已傾背嗚呼哀哉去家一年失二尊長想音容之如在隔死生猶反掌吾叔自少文雅開爽孰謂不學允克孝養頗恃其氣志高意廣命也大謬死幾於枉叔母之賢未見倫比事上則孝迄終如始撫下則慈親我如子豈惟親屬內外曾不聞於

間言而其懿美之行寔著於閭里窘於衣食幾二十年
初若未窘之時而泰然不形於辭也吾叔病革不復省
事奉之如未病之時而意不爲之少弛嗚呼哀哉人患
不賢賢亦終於是而已耳天之畀付所靳者壽齊眉偕
老人或鮮有如吾叔父叔母之年兮庶幾乎可以無憾
獨恨拊愛之恩未報兮泪盈襟而浹袖嗚呼哀哉

亡兄殯所祭文

嗚呼哀哉手足之戚惟兄一人家事勞苦兄先以身念

我孱削未嘗使親幸霑微祿庶代艱勤豈期中道死生
永分千里贛川似來訣別促膝歎語相守幾月病一沾
身便以死處問及後事了無一語始知我兄乃真丈夫
雖不享壽與壽何殊嗚呼哀哉我妣諱辰兄喪適歸我
祖是日亦棄庭闈使我聞之倍增痛傷恨此月日何其
不良嗚呼哀哉十年來歸閭里相迎豈無親戚不見我
兄依然旅櫬未即佳城縷調一酌式寫哀情嗚呼哀哉

亡妣謝氏焚黃祭文

嗚呼彼雛既飛反哺其母而我弗如米不及負彼木繁
蔭亦芘本根而我弗如封不及存想音容之如在隔生
死者逾三十年跡萍梗其靡定荒松阡而弗垣茲捧命
以還告庶有知於重泉鄉閭親戚頗喜以爲慶事獨難
釋於永慕兮增悲感而涕漣

承務卽焚黃文

某作於今年正月九日具奏乞將磨勘合轉一官回贈
祖父蒙聖恩特依所乞當月二十五日告下贈承務卽

謹擇今日焚黃者生平積善居多愷悌之稱名譽無聞
蓋乏朝廷之命幸遭明主優待邇臣因陳尊祖之情覲
被漏恩之澤恩綸亟下俯捉微眇之誠英魂有知未覺
幽冥之阻式涓穀旦虔叩玄廬奉芝檢以薦榮掃松阡
而迎貺相傳慶事足爲州里之光適慰孝心曷勝孫曾
之喜

中奉大夫碩人焚黃文

昨准紹興四年宗祀赦恩亡考贈朝請大夫今年三月

以某初除直學士亡考贈中奉大夫亡妣謝氏亡妣陳氏並贈碩人謹擇今日焚黃者舊秩新名既荷大君之命彞章異數薦為先德之光蓋皇慈優待於臣工故睿澤均施於存歿孝思罔極莫酬天地之恩神聽惟聰庶享邦家之慶

長壽焚黃文

某初除工部尚書蒙恩加贈考通議大夫妣謝氏妣陳氏並加贈淑人九月宗祀又蒙恩加贈考通奉大夫謹

擇今日恭詣墳下焚黃者嗚呼新命特封寔為異數明
裡申錫厥有彛章荐荷國恩式彰家慶自非積累流餘
澤於子孫安得褒崇發幽光於泉壤共稱榮事足慰孝
心伏惟英靈並歆休寵

祭姪孫六秀才文

嗚呼汝勤於學汝孝於親種不及實負汝之志養不及
祿負汝之誠菽水朝夕以慰安汝母之窮獨者尚違汝
願況期汝以立身揚名而益大吾門者徒亦媿余前知

之不明嗚呼哀哉汝父吾姪汝祖吾兄皆哭之靈今又
哭汝於垂暮之齡追往悼今痛傷我神

衆官祭曾恭人文

惟靈懿德淑儀自初有聞以配君子鸞和芷芬匪順則
賢警戒相成曷其有子義方訓勤煌煌命書載錫之榮
柔嘉欽止色意莫形死生常理亦既了達平生誦持藿
食戒殺維積恐多益大慶閱壽富寧謚百順因缺嗚呼
哀哉始則有終豈無契濶七十二年恍如電掣風獵銘

旌悲笳迅發薄奠斐詞庶悼永訣

代祭蔡宜人文

惟靈蘭玉殊稟綺羅慶門配時英之超軼兮方胥享於
鼎貴宛琴瑟之和好兮俄絃斷於駒奔悵音容之永隔
兮勞追惟於既往餘粉澤之芳膩兮慘閨闈而盡昏悲
夫哀哉吳山鬱蒼兮苕水潺湲擁旌旆以營築兮於山
間與水源無復曩昔兮參逐而乘之魚軒一祖載而不
復返兮若之何其不殞汨而消魂嗚呼哀哉夙懿厥德

雖亡若存惟厚終之至意兮藹情文之備緝顧死生可
以理遣兮盍亦師乎漆園之鼓盆聊潔誠於一酌尚有
媿於忘言嗚呼哀哉

代祭蔡元度文

元度三月五日卒於高郵
所生之地是日天文晦冥

嗚呼哀哉梁木壞兮天災莫禳變融和以霾曠兮迺辰
匪良傳我公之奄寂兮追諱駕於先皇生於其地而死
以之兮豈比夫東西南北遽隕越之無常嗚呼哀哉慙
不遺兮難測知於彼蒼計一日而千里兮孰不愴然而

盡傷時淵衷為之慘惻兮士類聞而彷徨又况乎賤子
之載恩兮將終天而感藏活微鮒於涸轍兮榮枯萎於
春陽傳鄒轂之羽翼兮發覆雞而照之以日出之光嗟
父母之鞠我兮初成就之無方微我公之遇兮幾何其
不擿埴而俛俛念丘山之報屈兮方負媿於蠅翔俄奪
我之天兮使我心摧而涕滂瞻衮繡以何及兮徒鼎彝
與縑緗悵朱絃之永絕兮去吾壘其誰將嗚呼哀哉淮
山蒼蒼兮淮水湯湯亟奔赴以未能兮百酸攬腸寄臨

風之一奠兮情馳越而飛揚恨百身之不可贖兮嗟我
之生兮不知其亡嗚呼哀哉

代祭林顯謨文

惟公德厚而方神和以清自其先世為特名卿公寔似
之騰茂飛英鷹揚鳳舉棣萼聯芬亦既有子作帝股肱
東府西樞萃於一門公其誰如安富尊榮壽考而疾匪
養則愆天子聞之遣醫十全靈餌弗瘳命也何言期公
百年秉國之鈞吁嗟已矣天胡不仁霽秀一水往哭無

因恭羞菲奠，薪格微禋。

代祭中書夫人文

吁嗟夫人，柔嘉欽止。天實相德，以配君子。載錫命書，煌煌金珠。夫人視之，淡然若無。孜孜奉國，大臣則勤。夫人助之夙夜，惟寅。龐眉在堂，袞衣在室。惟家之慶，夫人有溢。奄其逝矣，日月弗居。有懷懿行，孰不歎歔。蒼水之濱，既卜佳城。牲芻薄奠，式餞銘旌。

代祭安康馮夫人文

嗚呼夫人懿德淑儀自初有聞歸於其家孝子令孫煌煌命書豈不稱德華居備養壽富寧謚人孰不壽夫人則榮棣萼袞繡舉世莫倫今乎已矣餘慶益長卮酒奠誠聊示盡傷

挽詞


黃思賢母氏挽詞

思賢兄弟皆陞朝

哀響震重闈傷心薤露晞玉顏遺寶鏡仙馭想霞衣恨滿風中樹恩深草上暉空傳御史孝泣血故鄉歸

又

壽考推賢德安榮享慶門鴻鴻行令子蘭玉秀諸孫谷
暗風悲棘庭空露泣萱從今五色錦不復照温顏



高峯文集卷十二